



# ҚОРДАЙ ҚОРДАЙСКИЙ ШАМШЫРАҒЫ МАЯК

1932 жылдың қазан айынан бастап шығады

АУДАНДЫҚ ҚОҒАМДЫҚ-САЯСИ ГАЗЕТ

СӘРСЕНБІ 24 МАУСЫМ 2020 ЖЫЛ №51 (2908)

## Өңір жаңалықтары

### АДАМДАР ҚАУІПСІЗДІК ШАРАЛАРЫН САҚТАМАЙДЫ

**Б.САПАРБАЕВ COVID-19 АУРУЫНЫҢ КӨБЕЙУІНЕ ҚАТЫСТЫ ОЙЫН БІЛДІРДІ**

Бейсенбі күні Жамбыл облысы бойынша жедел штабтың кезекті отырысы өтіп, онда эпидемиологиялық жағдайды тұрақтандыру шаралары талқыланды. Өзін-өзі оқшаулау режиміндегі аймақ басшысы Бердібек Сапарбаев басқосуға онлайн байланыс арқылы қатысып отырды.

Б.Сапарбаев соңғы кездері инфекцияның таралу жағдайының нашарлап жатқанына, тұрғындардың жауапсыздығынан тіркелген оқиғалар саны өсіп отырғанына алаңдаушылық танытып, карантиндік және профилактикалық шараларды күшейту қажеттігіне назар аударды.

- 18 маусымдағы жағдай бойынша облыста 524 науқас тіркелген, оның 313-і Тараз қаласында. Қордай және Байзақ аудандарында да жағдай күрделі. Адамдар қауіпсіздік шараларына немқұрайды қарағандықтан, көрсеткіш өсіп отыр. Көптеген дүкендер мен супермаркеттер арақашықтықтың сақталуын және жеке қорғаныс құралдарының болуын бақыламайды. Адамдар шектеу шараларына қарамай, көп шоғырланып, отбасылық мерекелер ұйымдастыруда, - деді ол.

Жамбыл облысының бас санитарлық дәрігері Фазиз Надуев те өз баяндамасында жағдайлардың азаймай отырғандығын растады. Оның айтуынша соңғы аптада 139 оқиға тіркелсе, оның 77-і симптомсыз.

- Өткен аптамен салыстырғанда сырқаттанушылық деңгейі 1,3 есе өсіп отыр. Тараз қаласы мен Қордай ауданында аурудың 99 жағдайы тіркелді, бұл облыстағы жалпы аурудың 71,2 пайызын құрайды. 20 жастан 59 жасқа дейінгі ересек тұрғындар жалпы жағдайдың 73,2 пайызын құрайды. Менің ойымша, азаматтарды жоспарлы емдеуге жатқызуды тоқтата тұру, коронавирустық инфекциямен ауыратын науқастарға арнаған стационарды қарастыру және түсіндіру жұмыстарына елге белгілі тұлғаларды тарту қажет, - деп атап өтті ол.

Сондай-ақ, ол өткен соңғы айда мемлекеттік шекарадағы бес өткізу пункті арқылы Жамбыл облысына 12899 жүргізуші мен 1727 жаяу жүргіншінің кіргенін, халықтың санитарлық-эпидемиологиялық салауаттылығын қамтамасыз ету үшін келгендердің барлығы медициналық тексеруден өткенін айтты.

Экспресс-тестілеу әдісі олардың 8-і инфекция жұқтырғанын көрсетсе, ПТР талдауы арқылы тағы сегізінде оң нәтиже көрсеткен.

Бүгінгі таңда облыста 53 мониторинг тобы жұмыс істеуде. Олар объектілердің карантиндік іс-шаралар талаптарына сәйкес жұмыстарды қайта бастауға дайындығын, сондай-ақ дайындық сертификатын алған объектілердің қызметін бақылауда.

## Жұмыс сапары

### САПА МӘСЕЛЕСІ БАҚЫЛАУДА

Сенбі күні ауданымызға Жамбыл облысы әкімінің орынбасары Ұлан Жазылбек іссапармен келіп, ауылдардағы бірнеше құрылыс нысандарын аралап, қолға алынған жұмыстардың барысымен танысты.

Бірінші кезекте Ұлан Еркінұлы Қордай ауданы әкімінің орынбасары Ерлан Орынбаевпен бірге Гвардейский қалашығындағы ҚР БҒМ Ғылым комитетінің Биологиялық қауіпсіздік мәселелері ғылыми-зерттеу институты жанындағы вакцина шығаратын биофармацевтикалық зауытының құрылысымен танысты. Күні кеше Үкімет басшысы Асқар Мамин іргетасын қалап кеткен зауыттың құрылысы қарқынды жүруде. Ұлан Жазылбек құрылыс алаңында мердігерлермен кездесіп, олардың алдында өте жауапты іс тұрғанын ескертті. Себебі мұнда бүкіл әлемді дүрліктірген коронавирус инфекциясына қарсы вакцина өзірленбек. Облыс әкімінің орынбасары өз сөзінде жаңадан салынып жатқан бұл зауыттың халықтың денсаулығын сақтау жолында алар орны жоғары екенін және құрылыс жұмыстарын мерзімінде өрі сапалы аяқтау қажеттігін атап өтті.

2 →

## Тағайындау

Қордай ауданы әкімінің 2020 жылғы 22 маусымдағы №153ө-ж/к өкімімен **ЖАСЫБАЕВА РАЯ ТҮРҒАНҚЫЗЫ** Жамбыл облысы Қордай ауданы Қарасу ауылдық округі әкімінің міндетін атқарушы болып тағайындалды.

Жасыбаева Рая Тұрғанқызы, 1963 жылы 1 қаңтарда Жамбыл облысы, Қордай ауданы, Қарасу ауылында дүниеге келген. Ұлты қазақ. Білімі жоғары.

1988 жылы Скрябин атындағы Қырғыз ауыл шаруашылығы институтын экономист мамандығы бойынша аяқтап, еңбек жолын 1980 жылы «Искра Ленина» колхозында кіші экономист болып бастаған. 1985-1995 жылдары «Искра Ленина» колхозында бухгалтер, экономист, 1995-1996 жылдары «Өтеген» ШҚ бухгалтер, 1996-1999 жылдары «Өтеген» кооперативінде бухгалтер, 1999-2004 жылдары «Қызмет МТС» ЖШС есепші, 2004-2020 жылдары Қарасу ауылдық округі әкімі аппаратының бас маманы қызметтерін атқарған.



## Ауыл шаруашылығы

### Қызылша алқаптарында жұмыс қызу



Елімізде ауыл шаруашылығын дамыту, оның ішінде қант қызылшасы өндірісін жандандыру мақсатындағы жұмыстардың ауқымы жыл өте кеңейіп келеді. Осы ретте отандық тұқым шаруашылығын дамыту, азық-түлік қауіпсіздігін қамтамасыз ету мәселесімен қатар «тәтті түбір» өсіру ісіне де аса ден қойылған.

Айта кетсек, бұл мәселе қант өндірісін дамытудың 2018-2027 жылдарға арналған салалық бағдарламасын іске асыру тұжырымдамасында айқындалған. Осыған орай, ауданда қызылша шаруашылығын жандандыру және алқап көлемін ұлғайту жөнінде ауқымды іс-шаралар жоспары жасалып, кең көлемде іске асырылуда.

Мәселен, биыл ауданда аталмыш дақыл 500 гектар алқапқа егілсе, Беріктас ауылындағы «Тарылған» шаруа қожалығы алғашқылардың бірі болып он гектар жерге «тәтті түбір» өсіруді қолға алған екен. Ш.Көшербаева басқарып отырған шаруашылық аталмыш дақыл түрін биыл осымен төртінші жыл қатарынан өсіріп келеді. Сәуір айында себілген қызылшаның түбірі қазірдің өзінде қажетті мөлшеріне жетіпті. Шаруашылық алқабына су «Қақпата» су қоймасынан жетіп, арықтар арқылы суғарылады.

Қант қызылшасын өсіру оңай іс емес екені анық. Десе де, шаруалар білек сыбана іске кірісіп, дайындық жұмыстарын алдын ала жүргізеді. Мысалы, күзде сүдігер көтеріліп, минералды тыңайтқыштар шашылып, жер айдалады. Ал, ерте көктемде диқандалар топырақты қопсыту, тегістеу, тырмалау және себу жұмыстарын, одан кейін өнген дақылды күтіп-баптау жұмыстарын жүргізеді. Қазіргі таңда агроқұрылым жұмысшылары қызылшаның түбірін пайдалы фосфор аралас азоттық тыңайтқыштармен қоректендіруде.

«Тарылған» шаруа қожалығының өкілі И.Көшербаев ауаның райы қолайлы болған жағдайда жоғары өнімнен үмітті екенін айта келе, жанармай, минералдық тыңайтқыш сынды мемлекет тарапынан көрсетілетін көмектің пайдасы мол екенін алға тартты.

Қанат БІТКОВ

## АУДАНДЫҚ МӘСЛИХАТ ДЕПУТАТТАРЫНЫҢ НАЗАРЫНА

Аудандық мәслихаттың кезекті LXIX сессиясы 2020 жылғы 26 маусымда сағат 10.00-де аудан әкімдігінің мәжіліс залында төмендегі күн тәртібімен өтетіндігін хабарлайды:

1. 2019 жылғы аудандық бюджеттің атқарылуы туралы есебі.
  2. «Жер кадастры-жылжымайтын мүлік техникалық тексеру» департаментінің аудандық бөлімшесінің жұмысы туралы.
  3. Аудандық мәслихаттың 2019 жылдың 25 қыркүйегіндегі №56-3 Қазақстан Республикасы ауыл шаруашылығы Министрлігі «Ветеринариялық бақылау аумақтық инспекциясы» шешімінің орындалуы туралы.
  4. Ауылдық округ әкімдерінің жұмысы туралы (Отар, Ноғайбай).
  5. Аудандық пошта байланыс торабының жұмысы туралы.
  6. Салық базасын ұлғайту бойынша аудандық мемлекеттік кірістер басқармасының атқарылған жұмысы туралы.
  7. Қордай ауданы бойынша жайылымдарды басқару және оларды пайдалану жөніндегі 2020-2021 жылдарға арналған жоспары.
  8. Қордай ауданы бойынша аз қамтылған отбасыларға (азаматтарға) тұрғын үй көмегін көрсету Қағидалары туралы.
  9. «Қордай ауданы бойынша өлеуметтік көмек көрсетудің, оның мөлшерлерін белгілеудің және мұқтаж азаматтардың жекелеген санаттарының тізбесін айқындаудың Қағидаларын бекіту туралы».
  10. Әртүрлі мәселелер.
- Депутаттарды тіркеу сағат 9.30 - дан басталады.  
Аудандық мәслихат аппараты



МЕМЛЕКЕТТІК ҚЫЗМЕТШІ КҮНІ

# АБЫРОЙЛЫ МІНДЕТ

23 маусым күні Қазақстанның мемлекеттік қызметшілері төл мерекелерін атап өтті. Заманауи мемлекеттік қызметші дегеніміз білікті де дарынды ұйымдастырушы, түрлі саланы жетік меңгерген адам екені баршаға аян. Мемлекеттік қызметші қоғамға маңызы бар мәселелерді шешуге атсалысатын болғандықтан, ол қызмет барысында қабылдаған әрбір шешімі үшін жауапты. Сол себепті бұл батылдық пен зор жауапкершілікті, төзімділік пен әділдікті талап ететін қызмет. Осыған орай, біз айтулы мереке қарсаңында аталмыш салада 15 жылдан астам уақыт жұмыс істеп келе жатқан мемлекеттік қызметшілер арасында сауалнама жүргізіп, олар үшін мемлекеттік қызметтің мән-маңызы, жетістіктері жайында аз-кем сұрап білдік.

**Жүсіпбек СПАНОВ,**  
Степной ауылдық округінің әкімі:

Мемлекеттік қызметші болу мен үшін үлкен абырой, себебі мен мұны еліміздің, туған жеріміздің, қала берді Отанымыздың игілігі үшін атқарылған еңбек деп білемін. Менің жұмысым үлкен жауапкершілікті талап еткеніне қарамастан мен оны бар жан-тәніммен атқарамын. Бүгін менің қарамағымда Арал, Степной, Қалғұты ауылдары бар. Ауыл тұрғындары жеке бастың мәселесінен бастап, округке ортақ мәселелерге дейін арқалап келеді. Менің міндетім – әрбір тұрғынның талап-тілегін, арыз-шағымын ескерусіз қалдырмай, шама-шарқым жеткенше заң аясында сұрақтарына жауап беру, қолдауға зәру азаматтарға барынша көмек қолын созу. Әрине, қай жұмыста болмасын қиындық деген дүние болады. Алайда, мен ондай күрмеуі қиын мәселелерді ұжымыммен, тұрғындармен бірлесе шешуге тырысамын.



СПАНОВ  
Жүсіпбек  
Матайұлы

Біреуге таң болатын шығар, бірақ мен жұмысқа күнделікті зор құлшыныспен, сүйіспеншілікпен келемін. Мен екінші отбасымдай болып кеткен әріптестеріммен бірге белгілі бір белестерді бағындырып, әрбір алға басқан ісіміз үшін қуанамын. Біз бір бағытта бірлесе қадам басамыз. Меніңше жұмысты адал атқарудан, өзара сыйластықтан асқан ештеңе жоқ.

Тәуелсіздік алғалы еліміз дамудың даңғыл жолына түсіп, талай белестерді бағындырды. Степной ауылдық округі әкімдігінің ұжымы ауданымыздың, мемлекетіміздің дамуына үлес қосып жатқанына қуанамын. Мен үшін жұмысты абыроймен атқарудан, әріптестерді, ауылдастарды қолдаудан, туған ауылымыздың бір бөлігі болудан артық қуаныш жоқ.

Әріптестерімді кәсіби мереке Мемлекеттік қызметшілер күнімен құттықтап, еліміздің өркендеу жолында атқарған жұмыстарына табыс, зор денсаулық тілеймін!

**Анар МЕЙІРХАНОВА,** Отар ауылдық округі әкімінің орынбасары:



Білікке деген сенім мемлекеттік қызметшіден басталады. Мемлекеттік қызметші адал және әділ болуы тиіс. Сондай-ақ, ол заманауи қоғамның талабына икемділік танытып, тез бейімделуі шарт. Жалпы, мемлекеттік қызметші жұмысының сапасы марапатпен емес, қоғамға пайдалы нәтижемен бағаланады. Сонымен бірге, бұл салада белсенді өмірлік ұстаным, жауапкершілік пен жинақылық қажет, ал ең бастысы патриот болу қажет. Жеке басым мемлекеттік қызметке 16 жыл бұрын келдім. Мемлекеттік қызмет мен үшін уақытша әлеуметтік жұмысшы қызметінен басталған. Бұл салада мен тәжірибе жинақтап, жергілікті атқарушы органдардың негізгі міндетін түсінуге мүмкіндік алдым. Жұмысым көзге түсіп, маған әскери есеп үстелінің

жетекші маманы болу бақыты бұйырды. Содан кейін бас маман ретінде аудандық мәдениет бөлімінде қызмет атқардым. Қазіргі таңда Отар ауылдық округі әкімінің орынбасарымын. Мен үшін мемлекеттік қызметте болу зор абырой. Себебі мен мемлекеттік бағдарламалардың іске асуына және тәуелсіз Қазақстанның дамуына атсалысып келемін.

**Наталья ПОПЛАВСКАЯ,**  
Қордай ауылдық округі әкімдігінің бас маманы:

Мен мемлекеттік қызметте 26 жыл бойы жұмыс атқарып келгенімді мақтан тұтамын. Бұл қызметке 1994 жылы әскери есеп үстелінің инспекторы болып келгенім, 6 айдан кейін әскери есеп үстелінің бастығы болдым. Екі жылдан кейін салық жинау бөліміне ауыстым. Менің жұмысым жауапкершілікті, ұқыптылықты, ықыластылықты, мұқияттылықты талап етеді. Осы талаптарға сай болуға тырысамын. Менің ойымша әр адам өз жұмысын сүйіспеншілікпен әрі адал атқаруы тиіс. Сонда ғана жұмыс нәтижелі болмақ.

Әріптестерімді төл мерекелерімен құттықтап зор денсаулық, жұмыстарына табыс тілеймін!



**Марина БОЛГОВА,** жұмыспен қамту және әлеуметтік бағдарламалар бөлімінің бас маманы:



Мемлекеттік қызметтегі жұмыс өтілім 25 жылды құрайды. Осы жылдар аралығында мен мемлекеттік қызмет деңгейінің айтарлықтай жоғарылап, жаңа белеске көтерілгенін байқап келемін. Әрине, бұл заман талабына сай табиғи құбылыс. Бүгінде мен жұмыспен қамту және әлеуметтік бағдарламалар бөлімінің бас маманымын. Өз жұмысымды жақсы көремін. Бұл оңай сала емес, оның үстіне біздің саламызға қатысты заңнама жиі өзгеріп тұрады. Барлық өзгерістен дер кезінде хабардар болуың керек. Тұрғындар тарапынан түскен арыздар мен өтініштер бойынша заң аясында көмек көрсетуге тырысамыз. Себебі мемлекеттік қызметтің басты мақсаты – елдің игілігіне қызмет ету. Әріптестерімді төл мерекелерімен құттықтаймын, еңбекте табыс тілеймін!

Ләйлім ДОСЕМБЕКОВА

ПОЛИЦИЯ КҮНІ

# ТӘРТІП САҚШЫСЫ - ЕЛ ҚОРҒАНЫ

Қазіргі таңдағы қазақ полициясының бейнесі қандай? Өз басым «кешегі ел қорғаны болған батыр бабаларымыздың, жажүрек аға-аталарымыздың жалғасы – бүгінгі тәртіп сақшылары» деген тұжырымымды ортаға салсам ағаттық болмас деп ойлаймын. Сол себепті, полиция қызметкерлерінің төл мерекесіне орай тәртіп сақшыларының бір күндік жұмысымен танысып, олардың күнделікті тіршілігін назарларыңызға ұсынуды жөн көрдім.



Осылайша, мереке қарсаңында біз АПБ учаскелік инспекторы, полиция капитаны Саят Сүлейменмен кездесіп, маманның жұмыс барысын бақыладық. Иә, бір қарағанда қарапайым көрінетін бұл қызметтің машақаты көп-ақ. Таңның атысымен қызметтік автокөлігін тізгіндеген инспектор бірден аудандық полиция бөліміне бет алды. Сағат тілі 8.00. Аудандық полиция бөлімінде жеке құрам сап түзеп, басшылықтың нұсқаулығын мұқият тыңдады. Бұл қатарда біздің кейіпкеріміз Саят та бар. Одан кейін тікелей басшысының кабинетінен Саят бір бума қағаз бен бірқатар тапсырма алып шықты. АПБ басшылығы тарапынан түскен тапсырмалардың арасында тұрмыстық зорлық-зомбылықтан зардап шеккен азаматшадан түскен арыз да бар. Полицеймен бірге біз арызда көрсетілген мекенжайға барып, аталмыш азаматшадан түсініктеме алған инспектор, мән-жайды анықтап, жауапкершілік туралы ескерту беріп, жолдасымен профилактикалық сұхбат жүргізді. Саяттың айтуынша, мұндай оқиғалар жиі болып тұрады.

**«Отбасылық даулар жиі орын алады, көбіне жұбайлар уақыт өте келе татуласып кетеді. Сондықтан, бұл мәселені шешуде артық кетпеу қажет. Көбіне жолдасын қамауға алғаннан кейін әйелі өзі жүгіріп, оны босатуды сұрайды. Үйдегі проблемаларды жұптардың өздері шешкендері абзал»,** - дейді полиция қызметкері.

Осыдан кейін Саят дереу өзге жұмыстарға кірісті. Мысалы, ол осы күні карантин шараларына байланысты оның алдына сауда және қоғамдық тамақтану нысандарының өкілдерімен профилактикалық жұмыс жүргізу міндеті қойылған болатын. Бұл жұмыс Саятқа таң емес екені байқалады. Ол дүкендерге кіріп, өзін таныстырып, бетперде мен қолғап кию бойынша санитарлық ережелер мен оның қажеттілігін түсіндіріп, сатушылар мен сауда нысандарының иелеріне карантин кезінде жұмыс істеу кестесі туралы түсіндіріп өтті. Осылайша бірқатар шаруаны тындырған кейіпкеріміз өзге жұмыстарына кірісті. Учаскелік инспектордың жұмысы шартты түрде сағат 20.00-ге дейін жалғасады, алайда шұғыл жағдай бола қалған жағдайда түн уақытында да жұмысқа шақыртулар болуы мүмкін.

Саят Сүлеймен учаскелік инспектор қызметіне 2016 жылы келген. Өзі Қаракемер ауылының тумасы. Жас жігіт Алматы қаласындағы ҚР ІІМ академиясын аяқтап, туған ауылына қайтып оралады. Сол кезде оның өмірінде есте қаларлық жағдай орын алған.

**«Бұл оқиға мен Қаракемер ауылына учаскелік инспектор болып тағайындалғаннан кейін 1 айдан соң орын алды. Алғашқы тапсырмам. Ауылда ұрлық болды. Абырой болғанда ізін суытпай мен ұрыны анықтап, оны қамауға алдым. Содан соң оны Қордай ауылына жеткізу қажет болды. Басшылық пен жұмыстағы әріптестерім үнемі нұсқаулық беріп тұрғанымен, мен тәжірибенің аздығынан ұсталған адамға дұрыс тінту жүргізбесем керек. Оны көлікке отырғызып, полиция бөлімшесіне алып бара жатқанымда ол менің тамағына пышақ кезеді. Осылайша, ол көлікті тоқтатуымды талап етіп, қаша жөнелді. Бірнеше секундтың ішінде зәре құтым қашып, есеңгіреп қалдым. Бірақ, дереу есімді жинап, оны қуа жөнелдім. Оны қуып жетіп, қолынан пышақты қағып жіберіп, жерге құлатып, полиция бөліміне жеткіздім»,** - дейді Саят. Бұл Саят үшін үлкен сабақ болды, қазір ол қызметін тек нұсқаулыққа сай атқарады.

Осылай кейіпкерімізбен әңгімелесіп отырып түс болғанын байқамай қалыппыз. Ал, түстен кейін Саят жазасын өтеп келген азаматтардың жағдайын бақылап кетеді екен. Олар құқық қорғау органдарының қызметкерлерімен жиі кездесіп тұрады. Кеш батқанға дейін біз бірнеше үйге барып, учаскелік инспектордың әртүрлі адамдармен кездесуінің куәсі болдық. Осы кезде біз полицейдің жұмысы тек қана қылмыскерді ұстау, қамауға алу емес, сонымен қатар психолог пен медиатор жұмысын атқаратынын түсіндік.

Рас, полиция қызметкерлерінің жұмысы қиын-ақ. Дегенмен, олар бұл қызметті Отанға адал қызмет етіп, ел азаматтарының тыныштығын сақтау үшін таңдаған жандар.

Серғазы МАНАСБАЕВ



ҚОРДАЙ АУДАНЫНДАҒЫ  
АУҚАТТЫ, МАСАНЧИ ЖӘНЕ АЛҒА АУЫЛДЫҚ ОКРУГТЕРІ ӘКІМДЕРІН  
ТІРКЕУ ТУРАЛЫ ХАБАРЛАМА

Р/б №	Тегі, аты, әкесінің аты	Туған күні, айы және жылы	Ұлты	Білімі, мамандығы	Жұмыс орны, лауазымы	Тұрғылықты жері, мекенжайы	Партияға мүшелігі
1	2	3	4	5	6	7	8
<b>Ауқатты ауылдық округі</b>							
1	Манкеев Бірлік Орымбайұлы	01.12.1986	қазақ	Жоғары, әлеуметті жұмыс	Қордай ауданы әкімінің бас инспекторы	Қордай ауылы Болашақ көшесі, №59	«Nur Otan» Партиясы
<b>Масанчи ауылдық округі</b>							
2	Малиев Рамазан Омарович	06.03.1960	дүнген	Жоғары, инженер-механигі	Жұмыссыз	Масанчи ауылы Мәңгілік ел көшесі, №96	Көрсетілмеген
<b>Алға ауылдық округі</b>							
3	Абильдаев Берік Еркінұлы	17.02.1986	қазақ	Жоғары, қаржыгер	Сарыбұлақ ауылдық округі әкімінің орынбасары	Қаракемер ауылы Өтеген көшесі, №2	«Nur Otan» Партиясы

Қордай аудандық аумақтық сайлау комиссиясының төрағасы

А.СЫРЛЫБАЕВ

АТАУЛЫ ӘЛЕУМЕТТІК КӨМЕК  
АЛУШЫЛАР НАЗАРЫНА

Қордай ауданы әкімдігінің жұмыспен қамту және әлеуметтік бағдарламалар бөлімі 2020 жылдың 1 тоқсаны атаулы әлеуметтік көмегінің автоматты түрде созылуының аяқталғанын хабарлайды.

Осыған байланысты үстіміздегі жылдың 3-ші тоқсанына АӘК-ке өтініштеріңізді электронды үкімет порталы, жұмыспен қамту орталығы және ауылдық округ әкімдіктері арқылы тапсыру қажет екенін ескертеміз.

Жұмыспен қамту орталықтарында және ауылдық округ әкімдіктерінде кезектерді болдырмау мақсатында, 3-ші тоқсанға АӘК-ке құжаттарды тапсыру үшін алдын ала жазылуларыңызды сұраймыз.

Барлық сұрақтар бойынша Қордай ауылы, Бөлашов көшесі, №3 мекенжайында орналасқан жұмыспен қамту орталығына немесе 4-86-88 телефоны арқылы қайырылуға болады.

А.ЗАУРБАЕВА, бөлім басшысы

ЖОБА

Қордай ауылы

Стационарлық емес сауда объектілерін орналастыру орындарын және (немесе) маршруттарын айқындау және бекіту туралы

Аудан аумағындағы кездейсоқ сауда орындарын алдын алу мақсатында, Қазақстан Республикасының «Қазақстан Республикасындағы жергілікті мемлекеттік басқару және өзін-өзі басқару туралы» Заңының 2001 жылғы 23 қаңтардағы Заңының 31-бабының 1-тармағының 4-2) тармақшасына, «Сауда қызметін реттеу туралы» Қазақстан Республикасының 2004 жылғы 12 сәуірдегі Заңының 8, 12 баптарын басшылыққа ала отырып, Қордай ауданының әкімдігі **ҚАУЛЫ ЕТЕДІ:**

1. Сауда қызметін реттеу үшін стационарлық емес сауда объектілерін орналастыру орындары осы қаулының қосымшасына сәйкес бекітілсін.

2. Осы қаулының орындалуын бақылау аудан әкімінің орынбасары М.Күзербәевқа жүктелсін.

3. Осы қаулы алғаш ресми жарияланған күннен кейін он күнтізбелік күн өткен соң қолданысқа енгізіледі.

Аудан әкімі

Р.ДӘУЛЕТ

Қордай ауданы әкімдігінің  
2020 жылғы « » маусымдағы  
қаулысы жобасына қосымша  
№

ҚОРДАЙ АУДАНЫНЫҢ СТАЦИОНАРЛЫҚ ЕМЕС САУДА ОБЪЕКТІЛЕРІН  
ОРНАЛАСТЫРУ ҮШІН АРНАЛҒАН ОРЫНДАР

№	Ауылдық округ атауы	Сауда жасауға рұқсат берілген жер
1	Қордай	Қордай ауылы, Төле би көшесі «Бауырхан» базары, Қордай ауылы, Төле би көшесі «Үсен ұлы» базары, Қордай ауылы, Манас көшесі №33 «Барыс-2» базары, Қордай ауылы, Жібек жолы көшесінің бойындағы «Дастай ата» базары
2	Ноғайбай	Ноғайбай ауылы, Б.Момышұлы көшесі, №18 мекен жайының аумағы
3	Алға	Алға ауылы, Ж.Алдабергенов көшесі, №63 үйдің маңы
4	Кенен	Кенен ауылы, Орталық көшесінің бойы
5	Отар	Отар ауылы, «Береке» базары
6	Үлкен Сұлутөр	Үлкен Сұлутөр ауылы, Жібек жолы мен Д.Қонаев көшесінің қиылысындағы «Әлия» дүкенінің маңы
7	Сұлутөр	Сұлутөр ауылы, Жамбыл көшесіндегі «Айбар» дүкенінің маңы
8	Қасық	Әлжан ана ауылы, Н.Тлеубай көшесі мен Мичурина көшесінің қиылысының сол жағы
9	Степное	Степное ауылы, Тамаша көшесінің бойы
10	Жамбыл	Жамбыл ауылы, Бірлік көшесінің бойы
11	Бетқайнар	Бетқайнар ауылы, Төле би мен Жеңіс көшенің қиылысындағы «Қуаныш», «Айдана» дүкендерінің маңы
12	Қақпатас	Қақпатас ауылы, Қонаев көшесіндегі «Жұбатхан» дүкенінің маңы
13	Сарыбұлақ	Сарыбұлақ ауылы, Тайчибеков көшесі, Мәдениет үйінің қарама-қарсы беті. Қайнар ауылы, Ұшқоңыр көшесіне кіреберістің сол жағы
14	Қарасу	Қарасу ауылы, Нұрлы жол көшесі №3а
15	Ауқатты	Ауқатты ауылы, Абай көшесінің бойындағы «Әлия» дүкені мен №9 орта мектептің ортасындағы бос алаңша және Ауқатты ауылына кіреберістегі Тікжол көшесінің батыс жағында орналасқан ветеринариялық пункт пен техникалық қызмет көрсету стансасының (ТЖО) ортасындағы бос алаңша
16	Сөртөбе Булар ауылы батыр ауылы	Бұлыр батыр ауылы, Өркениет көшесі №62. Сөртөбе ауылы, Алтын Орда көшесі 143а. Сөртөбе ауылы, Биянху көшесі «Биянху» көкөніс базары маңы. Сөртөбе ауылы, Алтын орда көшесіндегі мал базары маңы. Сөртөбе ауылы, Алтын орда мен Шиваза көшесінің қиылысы.
17	Масанчи	Масанчи ауылы, Мәңгілік ел көшесі №13 бойында орналасқан кіші базар
18	Қаракемер	Қаракемер ауылы, Аймаш Баямбаев көшесі №2А мекен жайының аумағында. Қарасай батыр жолының қиылысында.
19	Қарасай	Қарасай батыр ауылы, Ж. Сураубаев көшесіндегі «Алтынай» дүкенімен №100 үйдің ортасындағы бос алаңша

ТЖБ ЕСКЕРТЕДІ

ҚАУІПСІЗ ЕГІН ОРАҒЫ

Алқаптардағы өрт қауіпсіздігін қамтамасыз ету мақсатында егін орағы мен жем-шөп дайындау науқанын жүргізу барысында өрт қауіпсіздігі ережелері қатаң сақталуы тиіс. Ол үшін төмендегі қауіпсіздік ережелері мен сақтық шараларын ұстану қажет:

- ауыл шаруашылығы кәсіпорындары мен шаруа қожалықтарының басшылары, жауапты жұмысшылар, кәсіпкерлер, сондай-ақ егін жинау, сақтау және өңдеуге жұмылдырылған азаматтар өрт қауіпсіздігінің талаптарын сақтауы тиіс;

- егін жинау кезеңінің алдында науқанға қатысатын барлық адамдар өртке қарсы нұсқаулықтан өтіп, ауыл шаруашылығы техникалары мен автомобильдер алғашқы өрт сөндіру құралдарымен (комбайндардың барлық түрлері мен тракторлар – екі өрт сөндіргішпен, екі күрек және екі сыпырғышпен), жарамды ұшқын сөндіргіштермен жабдықталуы тиіс және техниканың оталдыру және майлау тетіктері дұрыс жұмыс істеуі керек;

- астық алқаптарының орман және шымтезекті алқаптармен, дала жолағымен, тас және темір жолдармен шектесетін аумағының шөбі шабылып, ені 4 метрден кем емес жолақпен жыртылуы тиіс;

- астық жинау алқаптарының ауданы 50 га артық учаскелерге бөлініп, учаскелердің арасын 8 метрден кем болмайтын алымдарға бөлінуі тиіс;

- Алқапқа жақын жерден өрт шыққан жағдайда жану аймағын соқамен жырту үшін трактор дайын болуы қажет. Сондай-ақ, егін орылған жерлерде от жағуға рұқсат етілмейді.

Дәнді дақылдарды жинау және мал азығын дайындау кезінде капоттары жоқ немесе ашық капотты тракторлардың, өзі жүретін шасси және автокөліктердің жұмыс істеуіне, дөңкерлейтін шамды пайдалануға, автокөліктерге дала алқаптарында және түнгі уақытта жанармай құюға қатаң тыйым салынады.

Техника қозғалтқыштарының радиаторлары мен өзге тетіктері, шөпжинағыш, іріктеуіш сынды тораптары мен жинау машиналарының бөлшектері шаңнан, сабаннан және дөңдерден дер кезінде тазартылып тұруы қажет.

Жиналған шөп маяларының жоғары бөлігі мен қатарлары электр сымдарынан кемінде 15 метрге, жолдардан 20 метрге, ал ғимараттар мен құрылыстардан 50 метрге алшақ орналасуы қажет.

Маяларды орналастыру алаңдарының айналасы кемінде 4 метрлік жолақтармен жыртылуы тиіс. Жолақ шетінен маяға дейінгі арақашықтық сынды өзге де қауіпсіздік шаралары сақталуы керек.

Ең бастысы, ауыл шаруашылығы кәсіпорындарында егін жинау науқаны барысында өрт сөндіруге бейімделген қосымша кезекші техника мен білікті жұмысшылар міндетті түрде болуы тиіс.

Ф.БАЕКЕНОВ, Қордай аудандық ТЖБ бас маманы, азаматтық қорғау подполковнигі

КӨЛІКТЕРДЕГІ ӨРТ ҚАУІПСІЗДІГІ

Көліктердің жүру жиілігі мен жылдамдығының өсуі жол-көлік оқиғаларының орын алуына, адам өлімі мен материалдық шығынның артуына әкеліп соғады.

Автокөліктердің пайдалану тиімділігін арттыру оның қауіпсіздігінің қамтамасыз етілуіне тікелей байланысты. Оларды пайдаланудағы қауіпсіздікті арттырудың ең маңызды элементтерінің бірі, оның өртке қарсы қауіпсіздігін қамтамасыз етуде екенін ескертеміз.

Жалпы, автокөліктерде болған өрттердің салдары ауыр апаттарға, адам өлімі мен техникалардың істен шығуына әкеліп соғады. Сондықтан, автокөліктердің өрт қауіпсіздігін арттыру үшін оларды алғашқы өрт сөндіру құралдарымен жабдықтау қажет.

Ол үшін төмендегі өрт қауіпсіздігі ережелерін сақтаған жөн:  
- автокөліктердің механизмдері мен тораптарының дұрыс жұмыс істеуін қадағалаңыз;

- аккумуляторларды көлік құралдарында ғана пайдаланған абзал, оны үй жайларда қолдануға тыйым салынады;

- автокөлік тұрағы немесе гараж бөлмесінде жанатын материалдардан жасалған үй жиһаздары мен бұйымдарын не болмаса жанғыш сұйықтықтар мен тез тұтанатын сұйықтықтарды сақтамаңыздар;

- автокөлік тұрағы немесе гараж бөлмесінде темекі шекпеңіз;

- өрт дерегі орын алған жағдайда, жүргізуші тез арада автокөлікті тоқтатып, қозғалтқышын өшіріп, аккумулятор батереясын ажыратып, жолаушыларды қауіпсіз жерге шығарып, «101», «112» телефон номеріне қоңырау шалып, сол арада өртті алғашқы өрт сөндіру құралымен сөндіруге тырысуы қажет.

Автокөліктерде болған өрттерді талдау нәтижесінде өрттердің шығуының басты себебі автомобильдердің электр тізбектеріндегі ақаудың салдарынан болғандығы анықталды. Егер де автокөліктердің тетіктерінің ақаулары байқалған жағдайда оны тез арада жөндеу керек. Көліктердің электр тізбектерінде тек зауыттық үлгідегі қорғаныш қондырғыларын ғана пайдаланыңыз.

Ж.БЕКІБАЕВ, Қордай аудандық ТЖБ аға инженері, азаматтық қорғау майоры






## ТУҒАН ЖЕР

## Қасиетті мекен -



## Қаракемер



ДИРЕКТОР-БАС  
РЕДАКТОР  
Шолпан САБАНОВА

Газет 2012 жылғы 25  
шілдеде Қазақстан  
Республикасының  
Мәдениет және ақпарат  
министрлігінде  
тіркеліп, тіркеу туралы  
№ 12895-Г куәлік  
берілген

Бас редактордың орынбасары  
Әлібек ОСПАНОВ

Жауапты хатшы  
Жандос ОМАРОВ

ӘКІМШІЛІК БӨЛІМ:  
Гаухар ЖҰМАБАЕВА  
бас бухгалтер

МЕНШІК ИЕСІ:

«Қордай шамшырағы - Қордайский  
маяк» аудандық қоғамдық-саяси  
газеті» ЖШС

Мақала авторының пікірі редакция көзқарасын  
білдіруі міндетті емес

Жарнама мен хабарландырулардың мәтіні тіліне  
жарнама беруші жауапты

Газетте жарияланған материалдар мен суреттерді  
сілтемесіз басып көшіруге болмайды

Редакция оқырман хаттарына жауап бермейді, оны  
қайтармайды және авторлар қолжазбасы өңделеді

Көлемі 3 компьютерлік беттен асатын материалдар  
қабылданбайды

Кейбір суреттер интернет сайттарынан алынды

Ⓐ материалдың ақысы төленген

р/с KZ826010161000015589 БИК HSBKZKX  
МЕКЕНЖАЙЫ: Қордай ауылы, Төле би көшесі, 70.  
Тел: редактор, редактордың орынбасары: 4-51-63,  
жауапты хатшы және факс: 2-13-98,  
бухгалтерия: 2-27-08, тілшілер 4-51-62,  
e-mail: mayak1932@mail.ru, сайт: mayak1932.kz

Газет қазақ және орыс тілдерінде аптасына екі рет шығады:

СӘРСЕНБІ, СЕНБІ

Газет редакцияның компьютерлік орталығында теріліп,  
беттелді. Таралымы: барлығы - 9000 экз., қазақша - 4185 экз.,  
орысша - 4815 экз.

«КИИК» ЖШС баспаханасында басылды: Қордай а., Төле  
би к., 106.